

# Galacia'su

## a'inga Pablo tevaen'cho

---

### Chigambia'cho

**1** <sup>1</sup>Ña Pablo gi Jesúsne afa'su. Jesúsne afa'suve a'ija ñama ttu'se'fambi ni ñama tsa'caen moen'fambi. Tsa'ma Jesucristo ñama ttu'sepa moen. Chiga Quitsa Jesúsma pa'cho'ye ccase qquendyaemba ñama ttu'sepa moen. <sup>2</sup>Ñajan poi'cco ñai'ccu can'jensundeccui'ccu que'i Galacia'su Jesúsve in'jamba bo'fa'chodeccunga tevaemba gi chigambian'fa.

<sup>3</sup>In'jan gi cuintu Chiga Quitsa Na'su Jesucristo'qqe osha'cho ñotssiama que'inga afesi ñotsse opatsse canse'faye. <sup>4</sup>Na'su Jesucristoja tisuma afepa ingi egae tsincon'choma joqquitssiañe tsu pa. Nane ja'ño'su aindeccu egae tsincon'cho'ye Tiseja tsa'caen ingima ccushaen. Chiga ingi Quitsa tsu tsa'caen in'jan. <sup>5</sup>Chigaja ñoa'me'qqe ti'tsse'tssia. Tsangae tsu Tiseja ti'tsse'tssia. Tsangaeyi.

### Me'i'on tsu faesu condase'chove

<sup>6</sup>Que'i tayo faesu condase'choma in'jansi pañamba gi ñoa'me dyojo'cco. Nane Chigaja Cristo in'jan'choi'ccu que'ima ttu'sesi qui ja'ño Tisema cati'je. Tsa faesu condase'choja aquia'a tsu. <sup>7</sup>Tansi fae ñoa'me Chigane condase'choyi tsu jin. Tsa'ma majan a'i que'ima noñangiamba va Jesucristone Ñotsse Condase'choma cambiañe in'jan'fa. <sup>8</sup>Nama ñotsse paña'faja. Majan a'i ingi tayo ñotsse condase'choma ccaningae candusia'ninda, cuintu Chigaja tsa a'ima tsangae vanaenjan. Nane ingi, toya'caen sefani'su shondo'su'qqe, tsa'caen ccaningae candusia'ninda, cuintu ingima'qqe tsangae vanaenjan. <sup>9</sup>Tayo gi tsa'caen que'inga condasepa ja'ño'qqe ccase que'inga condaya: Majan a'i ingi tayo ñotsse condase'choma ccaningae candusia'ninda cuintu Chigaja tsa a'ima tsangae vanaenjan.

<sup>10</sup>¿Ñanda ti gi a'i ñotsse su'chove tta'tta? Me'i. Aquia Chiga ñotsse su'chove gi tta'tta. ¿A'i in'janquia'caen ti gi tson'jen? Me'i. A'i in'janquia'caen tson'choecan'da ñajan Cristove afa'sumbiye'can.

**Pablo Jesúsne afa'suve da'cho**

<sup>11</sup>Faengasundeccu, ñotsse paña'faja. Va ña que'inga condase'chota tsu a'i tisu injama'choi'ccu somboembi'choa. <sup>12</sup>A'inga vama atesumbipa Cristo ñanga attiamba atesian'choi'ccu gi atesu.

<sup>13</sup>Tayoe ñajan israendeccu in'janquia'caen gi in'jan. Tayo qui paña'fa ña tsa'caen in'jamba ma'caen tsincon'choma. Jesúsve in'jamba bo'je'chondeccuma gi panshaen quia'me noñangian, osha'ta tsa in'jan'choma tsangaeyi pasaeñe. <sup>14</sup>Israendeccu in'jan'chove gi tsain'bio ña faengasundeccuma ti'tsse pan'shantsse in'jan. Tsa'caen gi ñajan quinssetsse ingi tayopi'su coenzandeccu nafattian'fa'choma in'jan.

<sup>15</sup>Tsa'ma toya ñame meinte Chigaja ñama in'jamba ttu'se. Ñama ttu'sepa ja'ño Tiseja in'jamba <sup>16</sup>Tise Dutssi'yema ñanga attian, cuintsu ñajan israembindequianganga japa Tisene candusiañe. Tsa'caen ñanga attiansi gi faesu a'ima in'ajampañambi. <sup>17</sup>Ni Jerusaléni jambi gi tayo'su Jesúsne afasundeccui'ccu condaseye. Tsa'ma junde Arabia andeni'su a'i menia japa can'jembayi omboe toequi Damasco canqueni ji.

<sup>18</sup>Tsomba tres canque'fa pasasi gi Jerusaléni japa Pedroni can'su ja. Tisei'ccu gi dos avujaqui pa'cco can'jen'ma <sup>19</sup>cca'i Jesúsne afasundeccuma attembi. Nane Na'su Jesús quinshin Santiagoma gi atte. Tsa'ma faesumajan me'i. <sup>20</sup>(Chiga pa'tssima atesusi gi tansintsse que'inga tevaen'jen.)

<sup>21</sup>Omboe gi Siria andeni japa Cilicia andeni'qqe ja. <sup>22</sup>Judea'su Cristove in'jamba bo'fa'chondeccuja toya ñama cachuimbe'yi <sup>23</sup>aquia tsosinai'ccuyi qquen paña'jen'fa: “Tsa tayoe ingi in'jan'choma tsangaeyi pasaeñe in'jamba noñangian'su tsu ja'ño Jesúsve in'jamba tisene candusian'jen.” <sup>24</sup>Tsa'caen pañamba avujapa ñane Chigama ñotsse afa'fa.

**Pablo'qqe Jesúsne afa'su**

**2** <sup>1</sup>Tsonsi catorce canque'fa pasasi ñajan Bernavéi'ccu ccase Jerusaléni ja. Titoma'qqe gi ttu'sepa anga. <sup>2</sup>Chiga ñama in'jaemba mandasi gi ja tisu israembindequianganga Cristone candusian'jen'choma condaseye. Tsa'caen japa gi ti'tsse joccapitssiandeccui'ccuyi bopa condase. Aquia injanga candusiamba ti'tsse tsa'caen candusiansa'ne gi dyopa tise'pai'ccu condase. <sup>3</sup>Ñai'ccu jacan'su Titoja griego tsu. Chhiyitevaembi'choa tsu. Tsa'ma joccapitssiandequija tisema chhiyitevaeñe manda'fambi. <sup>4</sup>Nane majan afopa'cho Jesúsve in'jan'chondeccu afopoemba ingi'ccu fae'ngae ca'nimba tsa'caen mandaye in'jan'fa. Ingija Cristove in'jamba gi tayo'su manda'cho'ye ccusha'fa. Tsa'ma tsendeccuja ccusha'choma se'pipa toesu manda'choma ccase ingi in'jañe tsu in'jan'fa. Tsa'caen in'jamba Titoma chhiyitevaeñe su'fa. <sup>5</sup>Tsa'ma ni re'riccoeyi qquen gi tise'pa su'choma paña'fambi. Nane In'jan'fa gi que'ija Chiga ñotsse condase'choma pañamba tansintssia've an'bian'faye.

<sup>6</sup>Toya'caen joccapitssiandequuija ñama ti'tsse manda'fambi. (Nane tise'paja joccapitssia qqen su'fasi in'jambi gi. Tsa'ma Chiga poiya'ccoma atesi fae'ngatssi'fa tsu.) <sup>7</sup>Tsendeccuja ti'tsse mandambipa qqen tsu in'jan'fa: Chiga Pedroma in'jaemba mandasi tsu Pedroja va ñotsse condase'choma israendecunga condase. Tsa'caeni Chigaja Pabloma'qqe in'jaemba mandasi tsu israembindequuianga condase, qqen tsu in'jan'fa. <sup>8</sup>Nane Chigayi tsu Jesúsne afa'suve in'jaen'su. Pedromajan israendecunga condaye in'jaemba ñamajan israembindequuianga condaye in'jaen.

<sup>9</sup>Tsa'cansi Santiago, Pedro, Juan'qqe Cristove in'jan'cho a'i nasundeccu qqen su'chondeccu, ingija tise'pa'caen Chiganga in'jaemba fae sema'baveyi semasundeccu qqen in'jamba tivei'ccu ingima chigambian'fa qqen canjaeni. Tsa'caen chigambian'fa tise'paja israendecuma candusian'jemba ingimajan moen'fa israembindequuianga candusian'faye. <sup>10</sup>Toya'caen tsu in'jan'fa ingija aqqe'pambe'yi mendequuiama fute'faye. Nane tsa'caen futeye tayo in'jamba gi tayo tsa'caen fute'je.

### **Pabloja Antioquíani Pedroma iyu'u**

<sup>11</sup>Tsa'ma Pedro Antioquíani jisi gi tise'ma cambajunaccu iyu'u. Nane tiseja egae tsomba shacaensi gi tise'ma iyu'u. <sup>12</sup>Majan a'i Santiagone toya jimbi'te Pedroja israembindequui'ccu fae'ngae an'jen. Tsa'ma tsendeccu jisi Pedroja chhiyitevaeñe in'jan'chondeccu tise'ma afase'fasa'ne dyojopa israembindequui'ccu fae'ngae an'jen'cho antte. <sup>13</sup>Tsa'caen tsonsi cca'i ingi'su Jesúsve in'jan'cho israendeccu'qqe Pedroa'caeni dyopa antte'fa. Nane Bernavé'qqe tsa'caen dyopa antte. <sup>14</sup>Tsendeccuja tsa'caen tsomba Chiga tansintse condase'choma tansintse tson'fambi. Tsama atepa gi poiya'ccoma canjaeni in'jamba Pedroma su: “Queja israe'su, tsa'ma israe'su in'jan'choma qui cati. Tsa'caen catipa israembindequui'caen canse'ta ¿ma'caen qui queja israembindequuiama manda cuintsu israendecquui'caen canse'faye?”

### **Cristoveyi in'jamba ccusha'faya'cho**

<sup>15</sup>Ingija israendeccu. Ingi yayandeccu'qqe israendeccu tsu. Nane israembindequui'caen egae tsinconsundecumbi gi. <sup>16</sup>Tsa'ma in'jan'fa gi, a'ija Moisés manda'choma tson'fambi ño'ame daya'choe. Nane Jesucristove in'jamba tsu ño'ame daya'cho. Tsa'cansi gi Cristo Jesúsve in'jan'fa ño'ame daye. Nane manda'choma nani qqen tson'an'qqe ño'ame da'faya'bi qqen in'jamba gi Cristove in'jan'fa. Me'i'on tsu a'i manda'choma pañamba tsomba ccushaya'chove.

<sup>17</sup>Ño'ame daye in'jamba Cristove in'jansi, ¿osha'cho ingi egae tsincon'cho atteye'ninda ti “Cristo tsa'caen tsincoñe ingima manda” qqen in'jaña'cho? ¡Me'i! <sup>18</sup>Tsa'ma toe manda'chove ccase in'jamba canse qqen tson'da gi ccase egae tsincon'suve da. <sup>19</sup>Ño'a'me gi manda'choma pañamba paquui'caen oshambi. Tsa'cansi tsu manda'choja ja'ño ñama mandaye

oshambi. Tsa'ma ja'ñonda gi Chigama pañamba canse. <sup>20</sup>Cristoi'ccu gi fae'ngae avuja'ccongpa otiyepa paquua'caen pa. Tsa'camba ñajan ja'ño cansembisi, Cristo tsu ñani canse. Tsa'ma ñajan toya ai'vopa can'jen'ma Chiga Dutssi'yeye in'jamba gi ñoa'me canse. Tiseja ñama in'jamba tisuma afe ñama ccushaëne. <sup>21</sup>Chiga tsa'caen ñanga ñotsse tsonsi in'jambi gi tise ñotsse tson'choma chi'gaye. Nane manda'choma pañamba ccushaya'cho jinchoecan'da ñoa'me tsu Cristoja aquua paye'can. Tsa'ma tsa'cambi tsu.

### ¿Ma'caen tsu ccushaya'cho?

**3** <sup>1</sup>Galaciasundeccu, ñoa'me injamambi'fa qui. ¿Majan tsu que'ima afopoemba in'jaen que'i in'jan'choma catiye? Jesucristo avuja'ccongpa pasi tsane gi tansintsse condase'fa cuintsu que'i tansintsse paña'faye. <sup>2</sup>Ña que'ima qquen in'ajampaña: ¿Moisés manda'choma pañamba tsomba ti qui Chiga Qquendya'pama isu'fa? Me'i. Tsa'ma ñotsse condase'choma pañamba qui Chiga Qquendya'pama isu'fa. <sup>3</sup>¿Ñoa'me ti qui que'ija sumbi'fa? Chiga Qquendya'pa que'ima ccushaensi ¿ja'ñonda ti qui manda'choma tson'faya'cho ño'ame daye? <sup>4</sup>Cristove in'jamba osha'chone vanamba ¿aquua in'janga ti qui ja'ño tsama cati'fa? Me'i. Ñajan que'i tsa'caen tson'faye in'jambi. <sup>5</sup>Chigaja Tise Qquendya'pai'ccu que'ima in'jaemba Tise osha'choma que'inga canjaen'jen. ¿Que'i manda'choma pañasi ti Chigaja tsa'caen que'ima in'jaen? Me'i. Tsa'ma que'i ñotsse condase'choma in'jansi tsu tsa'caen tson'jen.

<sup>6</sup>Tsa'caen tayopi'su Abrahamjan Chigave in'jansi Chigaja su: “Que qui ño'a.” <sup>7</sup>Tsa'cansi poiya'cco majan Chigave in'jan'chota Abraham dutssiyendeccu tsu. <sup>8</sup>Tayopi Chigaja israembindequua jai'ngae ccusha'faya'chone in'jamba tsa ñotsse condase'choma Tise Tevaen'jenga conda. Nane israembindequua Tise've in'jamba ño'ame da'faya qquen in'jamba Chigaja Abrahamnga tayopi qquen conda: “Que'ye tsu poi ande'su aindeccu ti'tsse avujatssi canse'faya.” <sup>9</sup>Abrahamjan Chigave in'jamba avujatssi tsu. Tsa'cansi tsu Chigave in'jan'chondeccu fae'ngae tsa Chigave in'jan'cho Abrahami'ccu avujatssi'fa.

<sup>10</sup>Nane poiya'cco majan manda'choma pañamba ccushaye qquen in'jan'chondeccu tsu ñoa'me tsangae qque'faya. Tayo tsu tevaen qquen su'choma: “Majan va manda'choma pañamba pa'ccoma tsombi'ta ñoa'me tsu tsangae qque'faya.” <sup>11</sup>Tsa'cansi gi in'jan'fa me'i'on tsu majan a'i pa'cco manda'choma tsonsi Chigaja tisene: “Queja ño'a” qquen suya'chove. Tsa'ma Chiga Tevaen'jen tsu su: “Majan Chigave in'jamba ño'ame da'choja ñoa'me tsu canse'faya.” <sup>12</sup>Nane manda'choma nanimba ccushaye, qquen in'jan'chota tsu Cristove in'jamba ccusha'cho'cambi. Chiga Tevaen'jen tsu tsane su: “Majan manda'choma pañamba pa'ccoma metsse nani'da tsu ccushaya.”

<sup>13</sup>Majañi'qqe naniñe oshaya'bipa poiya'cco tsu Chigane shacapapa catiye'faya'cho. Tsa'ma Cristoja tsa shacama tisunga isu, Chiga Tevaen'jen suquua'caen, “Quini'congpa dusiamba fi'tti'cho a'ita tsu catiya'cho.”

<sup>14</sup>Cristo tsu ingine catiye'chove da, cuintsu tise've in'jamba ccusha'faye. Tise ccushaen'choi'ccu tsu israembindequua'qqe fae'ngae ingi'ccu Abraham isuya'cho Chiga Qquendya'pama isu'faya.

### Chiga manda'cho tsu omboe afe'cho

<sup>15</sup>Faengasundeccu, a'i tson'jenquua'caen gi que'inga condase. Fae a'i tise in'jan'choma tevaen'jenga tevaemba firmasi cca'ija tsama cambiañe ni fi'ttiye osha'fambi. <sup>16</sup>Tsa'caen Chigaja Abrahamnga, tise dutssi'yenga'qqe jai'ngae tsoña'chone condase. Nane dutssiyendeccu qqen condambi tsu tsain'bio a'i qqen suye. Tsa'ma Dutssi'ye qqen tsu conda. Nane fae'ccoeyi tsu conda. Tsaja Cristo tsu. <sup>17</sup>Tsa'cansi gi ñajan su: Tayopi Chigaja Abrahamnga jai'ngae tsoña'chone tansintsse conda. Omboe cuatrociento treinta canquue'fa Tise manda'choma'qqe afa. Tsa omboe afa'cho o'tie afa'choma fi'ttiye oshambi. Toya tsu Chiga o'tie afaquua'caen tsoña'cho. <sup>18</sup>Nane a'i Chiga su'choma isuye in'jamba manda'choma pañamba tsomba isu'choecan'da ñoa'me tsu Chiga aquua afe'biye'can. Tsa'ma Chigaja Abrahamnga aquua afeye qqen supa tsa'caen tsu tson.

<sup>19</sup>Tsa'ca'nijan ¿micoñe tsu Chigaja manda'choma afa? Nane Tise tayoe su'cho Dutssi'ye jiya'ngae Chigaja manda'choma'qqe afa'je cuintsu a'i atesu'faye tise'pa egae tsincon'choma. Chiga sefacconi'su shondosundeccuja manda'choma Moisésnga afa'fasi Moisésja aindecunga condase. <sup>20</sup>Tsa'ma Chigaja Abrahamnga jai'ngae tsoña'chone condasepa cca'ima mandambi cuintsu tisenga condaseye. Nane Chigaja fae'ccoeyi tsu. Tansintsse cambajunaccu Abrahamnga condase.

### Chiga manda'choja maestro'can tsu

<sup>21</sup>Qquen susi ¿manda'chota ti Chiga ñoa'me su'choi'ccu poini ccofettacco'je? Me'i. Manda'choi'ccuyi a'ima ccushaen'choecan'da tsa'caen tsu Chigaja mandaye'can cuintsu a'i ño'ame da'faye. <sup>22</sup>Tsa'ma Chigaja su majan Jesucristove in'jamba tsu ño'ame da'faya. Tsa'cansi Chiga Tevaen'jen tsu tansintsse conda egae tsincon'choja poiya'cco a'ima indiquua'caen tsu an'bian. Tsa'ma majan Jesucristove in'jamba tsu ño'ame da'faya. Tsendeccuyi tsu Chiga tayoe su'choma isu'faya.

<sup>23</sup>Toya Jesucristo jimbi'te Chiga manda'cho tsu ingima coirapa an'bian cuintsu jai'ngae bove ñotsse in'jamba ccusha'faye. <sup>24</sup>Nane du'shuma an'biamba atesianquua'caen manda'choja ingima atesian Cristo toya jimbi'te. Tise jisi gi Tise've in'jamba ño'ame dapa ccusha'fa. <sup>25</sup>Nane ja'ño Cristo tayo jisi manda'choja ingima atesiambi. Ingima coira'je'cho tayo pasa.

<sup>26</sup>Ja'ño Cristove in'jamba qui Jesucristoi'ccu fae'ngae jincho'fa. Poiya'cco qui Chiga dushundeccu'fa. <sup>27</sup>Nane poiya'cco que'i majan

Cristove in'jamba fetiye'ta ondiccu'jema ondiccuquia'caen qui Cristoma ondiccupa tisia'caen da'fa. <sup>28</sup>Ja'ño ni israendeccu, ni israembindequiqua jimbi. Ni patrónpa ni patrónme mendequiqua jimbi. Ni tsandie ni pushesuve qui attu'faen'fambi. Tsa'ma que'i poiyyi'cco qui fae'ccooyi'fa Cristo Jesús a'ive dapa. <sup>29</sup>Toya'caen que'ija Cristombe a'l'ta ñoa'me qui Abraham dutssiyendeccu. Osha'cho Chiga tise'panga afeya'choma que'l'qqe isu'faya.

**4** <sup>1</sup>Toya'caen gi su: Tise yaya afeye supa pasi du'shujá osha'cho tise yaya an'bian'choma tsu jai'ngae isuya. Tsa'ma tise toya chuite osha'choma an'bia'ma toya isumbipa ñoa'me sema'suma bove ñotssimbi tsu. <sup>2</sup>Nane coirasundeccu, angacansundeccu'qqe tise yaya manda'cho a'tangae tise ma manda'je. Tsequi a'ta napisi osha'choma tsu isuya. <sup>3</sup>Tsa'cañi tsu ingi'qqe. Ingija toya du'shua'caen Chigave in'jambipa gi va ande'su a'i in'jamba manda'choma paña'fa. Tsama pañamba osha'chove tson'jen'fa osha'ta tisu ccushaye. <sup>4</sup>Tsa'ma tseyi Tise in'jan'cho a'ta napijisi Chigaja Tise Dutssi'yema va andenga moen. Israe'su pushesu isusi tsu israe'suve da. Cca'i israendequiqua'caen tise'qqe manda'choma pañamba canseye ji. <sup>5</sup>Nane ingi manda'choma pañamba cansey'a'cho qqen in'jan'chondeccuma ccushaeñe tsu tsa'caen dapa ji. Ingima tsa'caen ccushaensi gi ñoa'me Chiga dutssiyendeccuve da'fa.

<sup>6</sup>Tsa'caen da'fasi Chigaja Tise Dutssi'yembe Qquendya'pama'qqe que'i injama'chonga moen. Tsa'caen moensi que'ini can'jemba que'ima in'jaen cuintsu Chigave in'jamba, “Ingi Yaya” qqen su'faye. <sup>7</sup>Chiga tsa'caen tsonsi que'ija ja'ño semasundequiqua'cambi qui. Ñoa'me Tise dutssiyendeccuve qui da'fa. Tsa'caen dapa qui dutssi'yenga afe'choma isu'faya.

### Pablo ñombi'ye'cho

<sup>8</sup>Tayopi, que'i toya Chigave in'jambi'te, faesu chiga'ca'ma qui in'jamba paña'fa. Tsa que'i in'jan'choja ñoa'me chigambi tsu. <sup>9</sup>Tsa'ma ja'ño qui ñoa'me Chigama in'jan'fa. Nane bove ñotsse su'cho tsu, Chigaja ja'ño que'ima in'jan. Tise tsa'caen que'ima in'jansi ¿micomba qui ccase va ande'su a'i in'jamba manda'choma paña'fa? Barembi tsu a'i manda'choja. Ñoa'me tsu que'ima fuitete oshambi. ¿Ccase ti qui toe manda'choma na'siamba vaná canseye in'jan'fa? <sup>10</sup>Chigama ñoquiañe qqen in'jamba qui majan a'ta, majan ccovu, majan fiesta, majan canqqe'fave'qqe in'jan'jen'fa. <sup>11</sup>Ñama qui dyoña'jen. ¿Aquia ti ñajan que'ima candusiamba atesian?

<sup>12</sup>Faengasundeccu, ñajan que'ia'caen dasi chigáne ñanga ma'de'faja. Ña que'l'ccu can'jensi qui ñama chi'ga'fambi. <sup>13</sup>Tayo qui atesu'fa ñajan me'ttia'ye que'ini jipa paji'a'qqe Cristone ñotsse condase'choma candusian. <sup>14</sup>Ñajan ñoa'me dyo'oe pajisi qui ñama mende'yepa

chi'ga'fambi ni cati'fambi. Tsa'ma Chigama sefacconi'su shondo'suma cachuiquua'caen qui ñama in'jamba ansundian'fa. Nane Cristo Jesúsma in'janquua'caen qui ñama in'jan'fa. <sup>15</sup>Que'i tsa'caen avujatssipa ¿micomba qui ja'ñojan ñai'ccu fae'ngae avujatssi'fambi? Ñoa'me gi in'jan ña que'i'ccu can'jensi qui ñama tsa'caen fuiteye osha'choecan'da que'i tso'fema'qqe somboemba ñanga afe'faye'can. <sup>16</sup>Tsa'caen in'jansi ¿ja'ñojan ña que'inga tansintsse condasepa ñoa'me que'ima chi'ga, qqen ti qui in'jan'fa?

<sup>17</sup>Va faesu atesiansundeccu que'inga ñotsse afa'je'fa. Tsa'ma injanga tsu tsa'caen afa'fa. Que'ima se'piye in'jan'fa ña atesian'jen'choma pañambe can'faye. Tsa'caen tsu in'jan'fa cuintu que'i tise'pa atesian'jen'choveyi paña'faye. <sup>18</sup>Cca'indeccu tise'pa in'jan'cho ñotssisi que'ima ñotsse in'jamba ñotsse afaye tsu ñotssi. Tsa'ma poi a'ta –ña que'i'ccu can'jensi tsambi'ta can'jembisi– tsu tsa'caen ñotsse afaya'cho. <sup>19</sup>Ña in'jan'cho dushundeccu, chan aiy'e'jequua'caen gi ccase vana'jen que'ine. Vana'jemba gi vana'jeña que'i Cristoa'caen da'faya'ngae. <sup>20</sup>Ña que'i'ccu ja'ño can'jeñe osha'ninda bove ñotssiya tsu. Tsomba gi tevaembe'yi tansintsse cambajunaccu condaseccoye osha'faya. Ñoa'me ja'ño que'ine jongoesu qqen asi'ttaeñe gi atesumbi.

#### Abraham dos pushene condase'cho

<sup>21</sup>Que'i manda'choma pañañe in'jan'chondecu, ñanga conda'faja. ¿Paña'fambi ti qui manda'cho su'choma? <sup>22</sup>Tseni tsu tevaen: Abrahamjan dos dutssi'yeve an'bian. Fa'eja tise'be sema'su pushesu Agar isu'cho. Faesuja tise pushe Sara isu'cho. <sup>23</sup>Sema'su pushesumbe du'shuja a'i in'jamba tsonsi isu'cho du'shu tsu. Tsa'ma tise pushembe du'shuja Chiga supa afesi tsa'caen isu'cho tsu. <sup>24</sup>Nane vaja condase'cho tsu, ingima atesiañe. Va dos pushesuja Chiga dos se a'i'ccu injancco'fa'chove tsu canjaen. Fae injancco'fa'chota tsu Sinaí Ccotta'ccongá afapa manda'cho. Tsaja sema'su pushesu Agarcan tsu. Tiseja sema'su pushesusi tise dushundeccu'qqe manda'choma pañamba sema'suve tsu da'fa. <sup>25</sup>Nane Agarja Arabia ande'su Sinaí Ccotta'ccoal'can tsu. Toya'caen tiseja ja'ño'su Jerusalén canquea'caen tsu poi'yi'cco israendeccu ma'caen tson'faya'choma canjaen. Agárja patrón mandasi sema'susi tise dushundeccu'qqe patrón mandasi sema'jen'fa. Israendeccuma'qqe tsa'caen manda'cho mandasi sema'jen'fa ccushaye qqen in'jamba. <sup>26</sup>Tsa'ma ingi sefacconi'su Jerusalén canqueja ccaninga tsu. Tsenijan patrón mechoandeqquia tsu can'jen'fa. Sara'qqe tsa'can tsu. Tiseja ingi chan'cansi gi ingi'qqe patrónme mechoa canse'fa. <sup>27</sup>Nane qqen tsu Chiga tevaen'jenjan su: Avujatsse fundo'jeja, dusumbi pushesu.

Queja, du'shuve me'cho cansepa, avujatsse settapoenjan.

Tisuyi canjen'su pushesu tsu tsandu'pama ti'tsse'o dushundeccuve an'bian.

<sup>28</sup>Tsa'cansi faengasundeccu, ingija Sara du'shu Isaac'can'fa gi. Patrón mechoa pushesumbe dushundeccu gi. Chiga susi isu'cho'fa gi. <sup>29</sup>Tsa'ma

tayopija a'i in'jamba isu'cho du'shuja Chiga susi qquendya'pa isu'cho du'shuma se'pipa noñangian. Ja'ño'qqe tsu tsa'cañi. <sup>30</sup>Tsa'ma ¿jongoe qquen tsu Chiga Tevaen'jenjan su? “Sema'su pushesuma joqqitssianjan tise du'shui'ccu. Tsambe du'shuja dutssi'yenga afe'choma isuya'bi. Patrón mechoa pushesumbe du'shuja tisuyi tsu dutssi'yenga afe'choma isuya.” <sup>31</sup>Tsa'caen tsonsi faengasundeccu, ingija sema'su pushesumbe dushundeccumbipa patrón mechoa pushesumbe dushundeccu gi.

### Patrón mechoja avujatsse canse'faja

**5** <sup>1</sup>Cristoja manda'cho patrón'ñe ingima ccushaen cuintsu ccushapa tsa'caen canse'faye. Ccushaensi tsa'caen canse'faja. Tisuma ccase afejama manda'cho que'ima ccase indiquia'caen mandasa'ne.

<sup>2</sup>Ña Pablo gi que'inga su: Ja'ño que'i tisu ttonoma chhiyitevaemba ccushaye qquen in'janinda Cristoja que'ima ccushaëñe oshambi. <sup>3</sup>Nane ccase gi su: poiyl'cco tsandie majan ttonoma chhiyitevaen'da, pa'cco manda'choma tsu naniña'cho, ccushaye in'jan'da. <sup>4</sup>Manda'choma pañamba ño'ame daye qquen in'jamba qui tayo Cristo'ye tisupa joqqitssipa can'jen'fa. Chiga que'inga ñotsse afe'choma qui chi'gapa cati'fa. <sup>5</sup>Tsa'ma Chiga Qquendya'pa ingima in'jaensi gi Jesucristove in'jamba ronda'je'fa. Ronda'jesi Chiga ingima ño'ame tsonsi gi tsa'caen da'faya. <sup>6</sup>Chhiyitevaemba canjaen'cho, ni chhiyitevaembe can'cho'qqe, tsu ingima ccushaëñe oshambi. Tansi Jesucristove in'jamba gi ccusha'fa. Nane Jesucristove in'jamba fuengasuma'qqe ñotsse in'jan'choyi tsu ccushaëñe bare.

<sup>7</sup>Que'i tsa'caen ñotssiana in'jañe ashaensi ¿majan tsu que'ima in'jaensi qui ja'ño ñotssia su'choma paña'fambi? <sup>8</sup>Nane Chigaja tsa'caen que'ima in'jaembi. Tiseja toya que'ima ttuse'je. <sup>9</sup>Nane cupana'cco re'riccoa pa'ccoma atapoenuquia'caen fae atesian'su poiyl'cco a'ima dañone osha. <sup>10</sup>Tsa'ma Na'su Jesucristo ñanga condasi gi atesu que'ija ña atesianquia'caen qui in'jan'faya. Majan que'ima noñangia'ninda Chigaja tsambe injama'choma somboeña. Nane joccapitssia tsambi'ta utu'ccoama'qqe tsu Chigaja tise injama'choma somboeña.

<sup>11</sup>Faengasundeccu, majan afopa'cho tsu su'fa ñajan toya manda'cho mandaquia'caen chhiyitevaemba ccushaya'chone candusian. Tsa'caen toya candusian'jen'ninda ¿ma'caen tsu ñama noñangian'fa? Ña tsa'caen candusian'choecan'da tsendeccuja iyicca'ye'fambiyecan tsu. Ni Jesús avuja'cconga ingi egae tsincon'choma joqqitssian'chone'qqe tsu zucco'fambiyecan. <sup>12</sup>Ñoa'me gi in'jan que'ima noñangiansundeccuja cuintsu tisupama chhiyicaticquia'caen que'l'ye tsangae joqqitssi'faye.

<sup>13</sup>Tsa'cansi tsu, faengasundeccu, Chigaja que'ima ttu'se cuintsu manda'cho'ye ccushapa canse'faye. Tsa'ma tsa'caen patrón mechoe dapa injanga egae tsincon'fajama. Tisupapora ñotsse injanccopa fae'ngae fuitecco'faja. <sup>14</sup>Ñoa'me pa'cco Chiga manda'cho tsu fae afa'choyi jin: “Tisuma in'janquia'caen tisupapora'qqe injancco'faja.” <sup>15</sup>Tsa'ma que'ija tisupaporai'ccu iyicca'yepa iyicco'ta, injama'tse, tsuma nepiansa'ne.



### Chiga in'jaensi canseya'cho

<sup>16</sup>Qquen gi ñajan su: Chiga Qquendya'pai'ccu in'jamba canse'faja. Tsa'caen canse'ta qui a'i injama'cho in'jan'choma tsincon'faya'bi. <sup>17</sup>A'i injama'cho in'jan'chota tsu Chiga Qquendya'pa'cambi. Chiga Qquendya'pa in'jan'cho'qqe tsu a'i in'jan'choa'cambi. Qquen cofettaccoquia'cansi qui que'ija tisu in'jan'choma tsoñe osha'fambi. <sup>18</sup>Tsa'ma Chiga Qquendya'pa ingima angaca'nijan tayo'su manda'choja tayo pasa.

<sup>19</sup>Poiyi'cco gi atesu'fa a'i injama'cho in'jamba tson'jen'choma. Qquen tsu tson'jen'fa: Tsandie, pushesu casarambe'yi fae'ngae canse'fa; injanga injama'cho tsosine egae in'jan'fa; tsa'caen in'jamba in'jangae tsincon'fa; <sup>20</sup>agattoen'su Chigama in'jambipa faesu chiga'ca'me ñoñamba in'jan'fa; faenga'suma dañe coragave da'fa; chi'ga'fa; iyicco'fa; injama'choni faesuma se'pi'fa; iyicca'yeyeyi jincho'fa; faesuma patsuye in'jan'fa; tisupanaccuyi in'jamba faesundeccumajan chi'ga'fa; ccaningae atesian'choma pañamba in'jan'fa; <sup>21</sup>faesuma injama'choni se'pi'fa; faesu a'ima fi'tti'fa; ccusipa'fa; panshaen fiestaemba ccusipa'fa; osha'cho tsa'caen tsu tsincon'fa. Tayo que'inga condaquia'caen gi ccase su: Majan tsa'caen tsincomba canse'ta Chiga aindeccuve daya osha'faya'bi.

<sup>22</sup>Tsa'ma Chiga Qquendya'pa in'jaensi ñotsse canse'faya'cho tsu qquen: Poiyi'cco a'ima ñotsse in'jan'fa; avujatsse canse'fa; opatsse canse'fa; iyicca'yembe'yi ron'daye atesu'fa; faesuma ñotsse tson'fa; faesuma mende'yepa afe'fa; tisu su'choma tsa'caen tson'fa; <sup>23</sup>patsumbe'yi opatssi'fa; tisu injama'cho, tisu ai'voma tansintsse in'jamba canse'fa. Nane manda'choja se'pimbi tsa'caen canse'faye. <sup>24</sup>Majan Cristombe'ta tsu tsa'caen a'i injama'cho in'jan'choma cati'fa. Tsangae, Cristoi'ccu fae'ngae avuja'cconga otiyepa paquia'caen tsu tayo'su in'jan'choma antte'fa. <sup>25</sup>Tsa'camba Chiga Qquendya'pa ingima in'jaensi canse'ta gi Tisema pañamba canse'faya'cho.

<sup>26</sup>Tisuja ñotssi qquen panshaen in'jan'fajama. Tisupapora noñangiancco'fajama iyicca'yesa'ne. Ni tisupapora injama'choni se'picco'fajama.

### Tisupapora fuitecco'faya'cho

**6** <sup>1</sup>Faengasundeccu, Chiga Qquendya'pa que'ima in'jaensi cca'i egae tsinconsi atte'ta tisema fuiteya'cho. Quinsepoembe'yi tsu tisema tansiaña'cho. Tsa'ma injama'tse, tisu'qqe tsa'caen egae tsinconsa'ne.

<sup>2</sup>Poiyi'cco fuitecco'faya'cho. Qquen tsu Na'su Cristoja manda.

<sup>3</sup>Majan tisu panshaen joccapitssi qquen in'jamba cca'ima fuiteye oshambi'ta ñoa'me bove'cco tsu. Tisuma tsu afopoen. <sup>4</sup>Tsa'ma poiyi'cco tsu tisu tson'choma asi'ttaña'cho. Tsa'caen asi'ttaemba ñotssiave atte'ta faesuma patsumbe'yi tsu avujatssiya'cho. <sup>5</sup>Nane poiyi'cco tsu tisupa egae tsincon'choma anduquia'caen angacaña'cho.

<sup>6</sup>Majan Chiga Aya'fama paña'da osha'cho tise ñotssiama tsu tisuma atesian'sunga attufaña'cho.

<sup>7</sup>Tisuma afopoen'fajama. ¿Ma'caen tsu a'tutsse injanga canse'choma Chiganga afopoen'faya? Jon'choma fae'ngatsse tsu taiya'cho. Tsa'caen que'i tsonquicia'caen, ccane'qqe que'inga tsoña. <sup>8</sup>Nane majan tisu injama'cho in'janquicia'caen a'i tson'jen'chove tson'da tsu me'detsse paya'chove isuya. Tsa'ma majan Chiga in'janquicia'caen Chiga Qquendya'pa tson'jen'chove tson'da tsu tsa Qquendya'pane tsangae canseya'chove isuya. <sup>9</sup>Quimbi'fajama ñotsse tsoña'choma. Ni ñoquimbi'fajama. Nane jai'ngae gi taiquicia'caen ñotsse isu'faya. <sup>10</sup>Tsa'camba ma'caen osha'ta tsu poiya'ccongá ñotsse tson'faya'cho. Fae'ngae Jesucristove in'jan'chondeccunga ti'tsse tsu ñotsse tson'faya'cho.

### Tsangaeyi anttepa chigambian'cho

<sup>11</sup>Nane ja'ño qui atte'fa ma'caen ñajan tisu tive'ccu rande tevaen'ttive que'inga tevaen'jen.

<sup>12</sup>Majan atesiansundeccuja que'i tsuma chhiyitevaeñe manda. Aqquia tsu tsa'caen manda cuintsu cca'indeccu tise ma ñotsse afaye. Toya'caen tsa'caen atesiamba Jesús avuja'ccongá papa ccushaen'chone candusian'fambi cca'indeccu tise'pama noñangian'fasa'ne. <sup>13</sup>Nane chhiyitevaenge'chondeccu'qqe pa'tssi manda'choma paña'fambi. Tsa'ma que'ima patsuye in'jan'fa cuintsu que'i tsuma chhiyitevaemba tise'pa shondosundeccuve da'faye. Tsa'caen dasi tsu ti'tsse patsuye afa'faya. <sup>14</sup>Tsa'ma tsa'caen ñajan patsuye in'jambi. Na'su Jesucristo ñane avuja'ccongá pasi gi avujatssi. Tsa'cansi osha'cho va andeni jincho tsu ñane pa. Ñajan tsama in'jambi. Toya'caen ñajan pa va ande'su a'i in'jan'cho'ye. Tsendeccuja ñama in'jambi. <sup>15</sup>Nane chhiyitevaen'cho ni chhiyitevaembe'yi can'jen'cho tsu bare'fambi ccushaene. Tsa'ma cuna a'ive tsu da'faya'cho tisu ccushaye. <sup>16</sup>Tsa'caen cuna a'ive dapa cansepa qui Chiga in'jan'cho aindeccu. Chiga que'ima mende'yesi qui opatsse canse'faya.

<sup>17</sup>Osefaen'chove que'ima afaye: majaan'qqe ñama noñangia'fajama. Nane Jesucristone vanamba iñacca'cho gi. Ña ai'vo tsu ña Jesucristove in'jan'choma canjen'jen.

<sup>18</sup>Faengasundeccu, Na'su Jesucristo tsu ñoa'me que'ima in'jamba que'i injama'choma in'jaeña.

Tsangaeyi.